

Filemom Paulõ kene bumanikiaki

FILEMOM

Paulõ Filemomkiri xinānikiaki, na hātcharā

¹ Ë Paulo Jesus Cristokiri kakape ē yusībaunai ea nemakī beshtenū ishū ea bitxikī akawanibu inū nukū betsa Timóteobetā mī nukube dayamis nukū haibu pepa Filemoom, ē mia keneshū bumaii, ² ha inū, habu mibetā Jesus Cristo ikūwaību mī hiwe anu itxamisbu anurā, nukū pui Áfia inū nukū betsa Arquipo, nukubetā Jesus Cristokiri kakape yusīkī bika tenemisbu anurā. ³ Mā unānuma hiwekubaīshanūbū haskatā ibubis mā hawa watirumabiakē Epa Deus inū nukū Shanē Ibu Jesus Cristo matuwē nuikī matu merabewakī hau matu duawakubainūbūwē.

Paulõ Filemom kēwākī Deus yukashūkubainikiaki, na hātcharā

⁴⁻⁵ Nukū Shanē Ibu Jesus Cristo abukī ikūwākī mī txibākubainai inū dasibi hawenabu meribiwē nuikī mī hatu duawamiskiri kakape nīkatā benimakī hanu ē Deusbe hātixaitiā mikiri xinākī ē Deus ē mia kēwāshūkubaīmiski. ⁶ Mia haska washūkinā, nū haska Jesus Cristo ikūwākī txibaī keska miāri haska xinākī hawē pepawē Deusū nuku dasibi duawamis mī nīka pewanū ē mia Deus yukashūkubaīmiski. ⁷ Jesus Cristowē ē betsaā, mī nuikipawē taea miwē taea benimai ē xinā txākaiī, ikūwaību Deusunabu meribi huīti xinā txākāwākī mī hatu nuikipa wakubaīmiswē taearā.

Paulõ Filemom hawē escravo dayaru Onésimo ea ashunikiaki, na hātcharā

⁸ Haskawē taeshū ea ē Cristõ kuxipayabiatū ē mia yunua ē yunua txibākī mī atirubia ⁹ haskakiri ē mia xināma hakia nui nū haibunameaiwē taeshū ē mia ea akaii. Earā, ē ma mestebuaii. Haskabiakē Jesus Cristo ē

dayashūkūkainaiwē taeshū natiā ea bitxikī akawashū ea meneshimabuki. ¹⁰Haskawē taeshū mia daewakī mia anu Onésimo ē nitxiaiī, hau mia dayashūri kanunā. Nenu ea meneshimabu anu hiweshū Onésimo Jesus Cristo ikūwāmakī ē xinā betsa wamaimawē taea mī dayaru escravo ē bake keskaki.

¹¹Uatiā mī escravo daya txakabui mia anua pashabaiama ikis nukubetā Jesus Cristo ikūwaiwē taea ana haskamaki. Nuku dabe merabewatiruki, nuku duawakinā. ¹²Onésimo ē abuhairai mia anu ē ana nitxiā kaikiki. Haki dakeama mī ea atiru xinākī haska keska washāwē. ¹³Jesus Cristō kakapekiri datā akī ē yusikubaūpanā bitxikī ea nemaimabu mī ea haska washū merabewatirumakē miwē Onésimō ea merabehairawakubaini yauxikī ē nitxīkatsi ikamabia ¹⁴mī ekiri xinākī yunuama ibianikē ē mia haskāwātirumaki. Mī xinānē mī ea yunu bestiai haska ea abukī mī ea amashūtiruki. ¹⁵Txanima uatiā haskatāra Onésimō mia heneyubiranima natiā ana txītūkaina uatiā mī habe imis keskama ma mibetā ikūwaiwē taea mī betsa kayabi keska ipakeshanikiki, ¹⁶ana mī dayaru keskama mī dayaru pepa binua mī abuai mī betsa kayabi keskarā. Eā ē abutxakayamabiaya miā abukī mī ea binumashanimēkaī. Dayaru escravo besti hayama hakia dayaru binūa keskai mibetā Jesus ikūwaiwē taea mī betsa keska mī hayashanaii.

¹⁷Haskawē taeshū ebetā Jesus ikūwākī mī ea haibuwaniki. Haska ekiri xinākī mī ea duawai keska wakī ewē taeshū Onésimo ana irishāwē. ¹⁸Mia haska wakī itxakawabiranimamēkaī. Mia devematā pashaimamēkaī. Haskarara ikiranimarā, ē petxiki netāwē, ¹⁹ē mia pakashanairā. Ē mia Jesus unāmaniwē taeshū miāri mī ea devehairaki. Haskakiri ea xināwē. Na mia keneshūkinā, ē mekē kayabiwē ē Paulō ē mia ashuaiī. ²⁰Ē betsaā, eskaki, xināwē. Mī ebetā Cristo ikūwaiwē, nukū Shanē Ibu benimawanū ika ana haki sinatama ewē nuikī Onésimo ea haska washūshāwē, ea huīti xinā txākāwākinā, haska nū Cristō betsawē taearā.

²¹Ē hātxa mī nīkakī txibāmis unākī ē mia keneshū bumaii, haska ē mia ea akai binukī mī pepawashanai xinākinā. ²²Ha inū, Deusbe hāttxakī mā ea yukashunaiwē taeshū Deusū hawawama hau hatu ea nitxīmashanū ikūwākī ē manaii, dateamarā. Haska inū, matu uī ka hanu ē iki kashanai anu ē ushati ea pewashūshāwē.

²³Jesus Cristo ikūwai atxishū ebe Epafras meneshabu hawē hāttxari mia bumaikiki. ²⁴Marcos inū, Aristarco inū, Demas inū, Lucasī ea merabewai dayamisbū habiaskari xinākī hatū hātxa mia bumariakanikiki.

²⁵Nukū Shanē Ibu Jesus Cristō hawē pepawē hau matu duawakubainūwē.

Hatiski, ē hāttxarā.

Paulo